

## 清嘉庆十七年(1812年)序

地輿之纪,唐虞以前,邈乎莫得而详矣。禹平水土,作《禹贡》。伯翳类物善恶则著《山海经》。孔安国《书》序曰:“九州之志谓之《九丘》。”考逸书有《九共》九篇,刘敞以为“共”当作“丘”,盖古字形相似而误。九州殊土异俗,各因其性,顺其旧而教扰之,故为九篇。《禹贡》所言形质也,《九丘》所言性情也。则谓孔子述职方以除《九丘》者,非也。

周官小史掌邦国之志,外史掌四方之志。汉时郡国地志皆上太史,故史迁本之以述《河渠》,班固因之以作《地理志》。后汉光武始诏南阳撰作风俗,郡国之书由是而作。晋挚虞作《畿服经》,其州郡及县分野、封略、事业、国邑、山陵、水泉、乡亭、城池、道里、土田、民物、风俗、先贤、旧好靡不毕载。后有作者权舆于是矣。顾自唐、宋以来,如《十道志》、《九域志》之类,犹专輿纪地。《元和郡县志》颇涉古迹。乐史《太平寰宇记》采摭繁富,博收人物,兼录艺文,体例为之一变。

明三百年间,郡邑之志遍天下,而康对山《武功志》、韩五泉《朝邑志》为独著。盖史以纪一代,而志以纪一方,上下古今,包罗贯串,臧否人物,旌别淑慝,详而不芜,简而有法,非具有良史之才者不能志,固未易言也。

乐邑之有志,始于明武宗时。吾乡温陵张公,本宋邑人李士会所辑《乐平广记》纂述成书。自是而后,递相增益,一修于有明,再修于国初。至乾隆十二年,前令陈公复详请修辑,属笔于教谕杨君,輿情弗协,讦讼蜂起。越十七年壬申,稽山王公继董其事,分为正志三十二卷,续志四卷,众议以定。今又六十年矣。

夫以乐之为邑,其山蔚以秀,其水浏以清,其人喜儒而尚节,刚直而好义。壤土衍沃,物产丰阜,灵气所积,钟为伟人,忠节如洪忠宣、程刚愍,经济如王时亨、马翔仲,风节如马仲涂、洪仲达,博雅如洪景庐、马贵与,此数公者,卓立寰区,焜耀简册,求之列史,尚难其人。而况芝生沈普之庐,滩湿饶娥之泪,麟麟炳炳,各有千秋。金石鼎钟,于斯为盛!今则康山无恙,泊水依然,而遗书之阁,汲古之斋,已不可复睹矣。“高山仰止,景行行止”,读是篇者,其能无慨然思、瞿然望耶!余览续志所载,自捐建文庙诸人而外,率寥寥不多及。而正史中如附“遗书”于“建置”,次“杂记”于“祥异”,入学名数不纪“学校”,驻防武职不列“秩官”。“人物”一门,区目过多,不无繁复,揆之体例,窃有未安。且旧版度藏不慎,残缺者若干页,余心嫌焉。思与邑之贤士大夫参互商订,汇为全编。顾惟兹事重大,未敢率尔操觚,爰先检校原本,补其讹落,以公费佐剞劂,使还旧观。夫此百余年中,岂无清风亮节、勤学笃行之事,足以式里党而垂简编!有其善而不为彰者,颠也;当其缺而不亟补者,疏也。余学识舛陋,又受事日浅,能无博搜掌故、考献征文、以成一方记载之盛,而徒掇拾于断简残编,为补苴罅漏计也。是则余之所深愧也夫!

嘉庆十七年八月知县陈云章

## 清道光七年(1827年)序

壬午岁,余自青阳调任乐平,适奉宪檄修县志,乃集邑绅士名宿,共襄厥事。甫定局,委署南丰。逾二年回任,又以俸满引见,往返京师,迄今五载,而书始告竣,非故缓也。盖尝语诸君子,他处之志难以增新,而乐平则难以守旧;他处难以求详,而乐平则难以就简。